



# ILIDŽA

INFORMATIVNI BILTEN OPCINE ILIDŽA





## 17. REDOVNA SJEDNICA OPĆINSKOG VIJEĆA

### **Odluka o usvajanju i provođenju Regulacionog plana "Hrasnica"**

Općinsko vijeće Ilidža na 17. redovnoj sjednici usvojilo je odluke o usvajanju i provođenju Regulacionog plana "Hrasnica", čiji je obuhvat 126 hektara i prostire se na dvije mjesne zajednice, Hrasnica I i Hrasnica II. Kroz izradu Regulacionog plana urađeno je idejno rješenje regulacije vodotoka Večerice i Bunice.

Planirane su tri lokacije za izgradnju podzemnih garaža, čime će se dobrim dijelom njihovom izgradnjom riješiti pitanje parking mjesta za ove dvije mjesne zajednice planirana je izgradnja novih objekata. Regulacionim planom stvorene su i mogućnosti za legalizaciju većeg broja objekata. Planirana je izgradnja i novih objekata u skladu sa zakonskim mogućnostima i zahtjevima vlasnika zemljišta.

### **Informacija o stanju bespravne gradnje u 2013. godini**

Vijeće je na sjednici razmatralo i Informaciju o stanju u oblasti bespravne gradnje na području općine Ilidža u 2013. godini. U informaciji su navedeni zakonski propisi kojima je uređen nadzor nad građenjem, organizacija inspeksijskih organa, opis stanja u ovoj oblasti sagledan kroz neposredno sprovođenje nadzora od strane urbanističko građevinske inspekcije. U toku 2013. godine urbanističko-građevinska inspekcija je imala 466 novih predmeta i višestruko veći broj kontrola na terenu. Upravni postupak je vođen u 79 predmeta za koje su donesena rješenja i zaključci o dozvoli izvršenja kojim su izrečene mjere propisane Zakonom o prostornom uređenju. Izvršeno je 12 rješenja od kojih je jedno izvršeno prinudno, a 11 su izvršili investitori sami. Kod ostalih 387 predmeta izvršena je kompletna kontrola nad građenjem, ali nije bilo osnova za izricanjem mjera. U toku 2013. godine bespravna gradnja je bila u manjem obimu u odnosu na raniji period i pretežno se odnosila na nastavak ranije započetih radova. Urbanističko građevinska inspekcija ima značajnu ulogu u preventivnom djelovanju informišući investitore o njihovim pravima i obavezama prilikom građenja u cilju podsticanja na zakonito ponašanje u ovoj oblasti., prihvatanju urbanističkih normi i poštivanju prava susjeda.

### **Sredstva od Ilidžanskog festivala za ugrožene od poplava**

Općinsko vijeće Ilidža na 17. redovnoj sjednici održanoj 29. maja 2014. godine u Multifunkcionalnoj sali, donijelo je zaključak da se sva sredstva namjenjena za organizaciju ovogodišnjeg Ilidžanskog festivala i Sarajevskog film festivala preusmjere u humanitarne svrhe za nastradale od poplava. Općinsko vijeće i načelnik u saradnji sa firmama Hoše Komerc, GP Butmir i ANS Drive, u okviru pomoći nastradalim mještanima vogošćanskog naselja Svrake, planiraju izgraditi četiri stambene jedinice. Na sjednici je donesen zaključak da se formira i komisija koja će imati zadatak da evidentira svu nastalu štetu na prostoru općine i da u skladu sa tim reaguje na pravi način.

### **Informacija o poduzetim mjerama i aktivnostima na otklanjanju posljedica od poplava**

Vijećnici su informisani i o poduzetim mjerama i aktivnostima na otklanjanju posljedica nastalih prirodnom nesrećom – poplavama, na području općine Ilidža. Nivoi vodotoka rijeka Željeznice, Bosne, Dobrinje i Kasindolskog potoka su bili u stalnom porastu i bili su na samoj granici izlivanja te su poduzete redovne mjere odbrane od poplave. Najteža situacija je bila u mjesnoj zajednici Osjek, Blažuj, te u naseljima Bojnik i Doglodi. Angažovano je 20 povjerenika u osam mjesnih zajednica koji su radili na prikupljanju informacija sa ugroženih područja, istovaranju vreća sa pijeskom i pravljenju nasipa, te dijeljenju hrane, vode za piće, gumenih čizama i lopata. Angažovana je i služba zaštite i spašavanja prve pomoći i logistike organizovana u Crvenom križu Ilidža. Firme „Euro-asfalt“ i „Bosman“ radile se na pročišćavanju korita i putnih komunikacija u Vlakovu, a specijalna mašina KJKP „Vodovod i kanalizacija“ radila je na čišćenju šahtova prema gradskom groblju Vlakovo da bi se osposobila putna komunikacija. KJKP Rad je izvršio pranje ulica u naselju Doglodi i odvoz smeća iz ulice Bregovi. Na sjednici vijeća je istaknuta zahvalnost donatorima: Kantonalna uprava CZ, PVB Sarajevo, KJKP Rad, Senigor, Crveni križ Ilidža, Federalna uprava CZ, Kiseljak d.o.o., Euro-asfalt, Hoše komerc, Robot Komerc, Avaz, općine Centar i Novo Sarajevo.

# SA 16. REDOVNE SJEDNICE OPĆINSKOG VIJEĆA

## Odluka o privremenom korištenju javnih površina

Općinsko vijeće Ilidža na 16. sjednici održanoj 14. maja u Multifunkcionalnoj sali Općine Ilidža donijelo je Odluku o privremenom korištenju javnih površina. Ovom odlukom utvrđeni su uslovi i kriteriji za dodjelu lokacija za privremeno korištenje javnih površina, visinu naknade i način naplate. Visina i način plaćanja naknade određeni su prema zonama, koje se sastoje od pet zona. Dodjelu lokacija i izdavanje odobrenja za privremeno korištenje javnih površina vrši Općinski načelnik putem službi za upravu iz oblasti prostornog uređenja i komunalnih poslova. Pravo na privremeno korištenje javnih površina imaju fizička i pravna lica registrovana za obavljanje djelatnosti. Javne površine mogu se privremeno koristiti za postavljanje kioska, prodajnih stolova, javni parking prostor, slobodnostojeće otvorene bašče, održavanje kulturnih, zabavnih, sportskih, humanitarnih i drugih manifestacija.



## Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge zaključaka o neprihvatanju ponuda sljedećih nosilaca prava korištenja: Čarapić Nikola i Čarapić Dušan. Usvojeni su i prijedlozi rješenja o rješavanju imovinsko-pravnih odnosa u svrhu prestanka prava korištenja po zahtjevima Čebo Nermina, Čengić Raze, Dragović Miloša, Drašković Marinka, Džabija Merze, Hadžibulić Lutve, Hajdarpašić Samira, Jusufović Idrisa, Mahmutović Hajrudina, Mahmutović Fatime, Bećirović Muniba i Muhović Bećira, te prijedlog rješenja o preuzimanju neizgrađenog gradskog građevinskog zemljišta radi privođenja krajnjoj namjeni od nosioca prava raspolaganja KRO „PARK“-OOUR „FLORA“ Sarajevo. Vijeće je usvojilo i prijedlog rješenja o dodjeli gradskog građevinskog zemljišta u svrhu izgradnje stambeno-poslovnog objekta po zahtjevu „PANAMERA“ d.o.o. Sarajevo.

## Donešena Odluka o nerazvrstanim cestama

Općinsko vijeće usvojilo je Odluku o nerazvrstanim cestama na području općine Ilidža. Ovom odlukom uređuje se izgradnja, korištenje, održavanje, zaštita, rekonstrukcija i poslovi nadzora na području općine Ilidža. Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika, a nije razvrstana u jednu od kategorija javnih cesta. Gradi se i projektuje minimalne širine kolovoza 4,5 metra za dvosmjerni i 3,0 metra za jednosmjerni promet sa konstrukcijom koja podnosi minimalno osovinsko opterećenje od pet tona. Održavanje nerazvrstane ceste obuhvata izvođenje radova kojima se osigurava nesmetan, siguran saobraćaj i očuvanje projektovanog stanja ceste.

Poslovi održavanja će obuhvatiti planiranje održavanja, ophodnja i redovno praćenje stanja ceste, zamjena i popravljavanje saobraćajne signalizacije, održavanje sistema oborinske odvodnje i održavanje prohodnosti u zimskim uslovima. Planiranje razvoja vrši se u skladu sa Strategijom razvoja lokalnih i nerazvrstanih cesta kojom se određuju ciljevi i zadaci razvoja ceste, a donosi je Općinsko Vijeće za razdoblje od 10 godina. Predviđena kazna za fizička lica koja vrše izgradnju ceste bez odobrenja za građenje, kreću se u iznosu od 200,00 do 300,00 KM. Za prekršaje iz ove Odluke kaznit će se investitor, izvođač radova, preduzeće, općinski organ ili drugo pravno lice novčanom kaznom u iznosu od 200,00 do 1.000,00 KM.



## Odluka o visini naknade za pogodnost gradskog-građevinskog zemljišta-rente

Vijeće je na sjednici donijelo Odluku o visini naknade za pogodnost gradskog, građevinskog zemljišta-rente na području općine Ilidža za 2014. godinu. Visina naknade za pogodnost određuje se po zonama u procentu od konačne prosječne građevinske cijene i fiksnog procenta rente koji se razlikuje u odnosu na zone. Prva zona u procentu iznosi 64,50 KM, druga zona iznosi 53,75KM, treća 43,00KM, četvrta 32,25KM, peta 21,50KM i šesta zona 10,75KM.

## Odluka o utvrđivanju prosječne konačne građevinske cijene po jednom metru kvadratnom korisne površine u stambenoj izgradnji

Na 16. sjednici Općinsko vijeće usvojilo je i Odluku o utvrđivanju prosječne konačne građevinske cijene po jednom metru kvadratnom korisne površine u stambenoj izgradnji na području općine Ilidža za 2013.godinu, kojom se utvrđuje prosječna konačna građevinska cijena metra kvadratnog korisne stambene površine u iznosu od 1075,00KM. Dostavljena je informacija o građevinskoj cijeni metra kvadratnog korisne stambene površine u 2013 godini od strane građevinskih firmi, kao i Zavoda za statistiku Federacije BiH.



## Zimsko održavanje cesta na području općine Ilidža

Informacija o zimskom održavanju cesta na području općine Ilidža, bila je jedna od tačaka dnevnog reda na 16. sjednici. Zimsko održavanje na području općine Ilidža zasniva se na uklanjanju snijega sa kolovoza sa pratećim aktivnostima neophodnim za odvijanje bezbjednog pješackog i motornog saobraćaja, te održavanju saobraćajne signalizacije. Zimsko održavanje saobraćajnica je provedeno u periodu od 15. novembra 2013. do 15.marta 2014 godine po utvrđenim prioritetima i sa određenom mehanizacijom opremljenom za izvođenje radova. Izvođači radova, odnosno firme zadužene na području naše općine bile su „Grakop“ d.o.o Kiseljak, „Bosman“ d.o.o Sarajevo i KJKP „Rad“ Sarajevo.

## Zakon o pravima branilaca

Vijeće je informisano o provođenju Zakona o pravima branilaca i članova njihovih porodica i Zakona o posebnim pravima dobitnika ratnih priznanja, odlikovanja i članova njihovih porodica. Navedenim zakonom uređeni su uvjeti, način i postupak za ostvarivanje prava ratnih vojnih invalida i članova njihovih porodica, članova porodica šehida, članova porodica poginulih, umrlih, nestalih i prava demobiliziranih branilaca kao i lica zaslužnih u odbrambeno-oslobodilačkom ratu i druga pitanja iz oblasti boračko-invalidske zaštite.

## Informacija o prijedlogu mjera i aktivnosti zaštite od požara

U okviru Programa rada, a u skladu sa Zakonom o zaštiti od požara i vatrogastva Općinsko vijeće Ilidža razmatralo je Informaciju o prijedlogu mjera i aktivnosti zaštite od požara u ljetnom periodu sa stanjem protivpožarne zaštite na teritoriji općine Ilidža. Općina Ilidža svojim položajem, veličinom, brojem stanovnika, površinom šumskih predjela spada u prostore sa povećanim rizikom ugroženosti od požara. U informaciji su iznesene mjere zaštite od požara na šumskim i poljoprivrednim površinama, otvorenim prostorima, zaštita putem video nadzora, mjere zaštite industrijskih objekata i skladišta, mjere za poboljšanje pristupačnosti, hidrantske mreže i poboljšanje efikasnosti vatrogasnih jedinica sa kaznenim odredbama, a sve u cilju upoznavanja građana i pravnih subjekata.

## Posjeta visokog predstavnika u BiH Valentina Incka Općini Ilidža

Visoki predstavnik u BiH Valentin Incko posjetio je 27. maja 2014. godine Općinu Ilidža. Sa načelnikom prof. dr. Senaidom Memićem je razgovarao o trenutnoj situaciji poplavljenih područja na području općine. Načelnik Memić je informisao visokog predstavnika o svim aktivnostima i akcijama koje je Općina Ilidža poduzela tokom perioda poplava, kao i da se ova institucija uključila u akcije pomoći i drugim poplavljenim područjima u Maglaju, Janji, Olovu, Doboju i Vogošći. Visoki predstavnik upoznat je sa svim trenutnim i budućim projektima koje Općina Ilidža implementira. On je pohvalio rad Općine Ilidža, kao i spremnost ove lokalne zajednice da na pravi način reaguje u kriznim situacijama.



## Posjeta delegacije turske Općine Unye Ilidži

Delegacija turske općine Unya posjetila je 29. maja 2014. godine Općinu Ilidža. Sa načelnikom prof. dr. Senaidom Memićem razgovarali su o uspostavi privredne i kulturne saradnje ove dvije općine. Načelnik Memić je upoznao goste sa historijatom i razvojem općine Ilidža kao i sa budućim planovima. Delegacija je izrazila želju za investiranjem i daljom saradnjom, a načelnik je pozdravio ovakav prijedlog kojim bi se stvorila mogućnost za zapošljavanje mladih sa prostora općine Ilidža.



## Prijem za direktore osnovnih škola

Načelnik Općine Ilidža prof. dr. Senaid Memić upriličio je prijem 13. maja 2014. godine za direktore osnovnih škola sa područja ove općine. Loša materijalna situacija i neplaćanje računa dobavljačima u školama, bila je tema razgovora ovog sastanka. Općina Ilidža će i ubuduće, a u skladu sa svojim zakonskim mogućnostima iznaći sredstva kojim bi se poboljšali uvjeti rada u školama, obećao je načelnik Memić. Direktori osnovnih škola obavjestili su načelnika i o pripremama proslave zajedničkog dana osnovnih škola, gdje su također dobili podršku. Načelnik je iskazao dalju podršku direktorima u njihovom radu i aktivnostima koje provode u nastavnom procesu. Direktorica Treće osnovne škole Fatima Habota uručila je Zahvalnicu načelniku Memiću za podršku i pomoć ovoj obrazovnoj ustanovi.



# Posjeta Potočarima

U organizaciji Općine Ilidža i ove godine, u cilju odavanja počasti žrtvama genocida i suosjećanja sa onima koji su izgubili svoje najmilije, 31. maja 2014. godine organizovana je jednodnevna posjeta Memorijalnom centru Potočari, Srebrenica. Kolona od 12 autobusa u pratnji automobila Federalne uprave policije i ambulantnih kola udruženja „Obiteljska pomoć“ u ranim jutarnjim satima uputila se prema Srebrenici.

Načelnik Općine Ilidža prof. dr. Senaid Memić ispratio je 550 učenika, njihovih nastavnika i organizatora na put u Memorijalni centar Potočari, Srebrenica. Učenici su za nešto manje od četiri sata vožnje stigli u Potočare. Jačina šehidskog svjetla jasan je putokaz za buduće generacije. Potočari, simbol otpora i simbol stradanja. Na kratkom historijskom času predavačica koja je i sama preživjela genocid podsjetila je ilidžanske osnovce na događaje koji su se desili ovdje 1995. godine.

„Genocid u Srebrenici dogodio se 11. jula kada su masovno ubijani Bošnjaci, muškarci u rasponu od 12 do 80 godina. Genocid je počinila Vojska Republike Srpske pod komandom generala Ratka Mladića, kojoj su se priključili Škorpioni, paravojna formacija pod kontrolom srbijanskog Ministarstva unutarnjih poslova. To je najstrašniji događaj u suvremenoj evropskoj povijesti. Tu se desio najveći pokolj u Evropi nakon Drugog svjetskog rata u kojem je ubijeno više od 10.000 ljudi. Najmlađa žrtva, koju su zločinci oteli nakon rođenja iz

naručja majke živjela je samo nekoliko minuta. Zvala se Fatima Muhić. Ona je ukopana prošle godine, gdje je ukopana i najstarija žrtva koja je imala 89 godina. Ovdje što se dogodilo vašim vršnjacima ne ponovilo se nikad nikome na planeti zemlji“ u svom izlaganju istakla je predavačica Memorijalnog centra koja je i sama izgubila svoje najmilije.

Muk tišine u Potočarima govori više od riječi. Normalnom ljudskom biću je neshvatljiva mržnja koja je rezultirala višednevnom pokolju, samo zato jer su se drugačije zvali. Marame na glavi srebreničkih majki bile su povod da joj se oduzme čast. Sa majčinih grudi trgao je krvnik tek rođene bebe. Dječaci od 12 godina su za njih predstavljali opasnost, jer su nosili simbol života. Zbog imena odvođeni su u smrt nisu imali priliku za još jedan majčin zagrljaj. Duše smirene u Potočarima moraju biti opomena. Nova srebrenička djeca će se roditi i pokazati svijetu da njihovi djedovi, očevi, amidže, nisu uzalud ubijeni, jer život će se nastaviti kao i njihova borba za istinu i pravdu. Zločinci trebaju čuti, njihov zločin neće zastarjeti. Ako ih ne kazni ovozemljaski, sud Božiji sigurno hoće. U hali prijeratne tvornice akumulatora prikazan je dokumentarni film o stradanju nevinih ljudi. Nije se čula ni graja, smijeh ni poznato dječije zezanje. Kao da su shvatili tugu i jezu koja se ovdje osjeti na svakom čošku. Suzne oči majke i snagu kojom ona odiše kada priča u dokumentarnom filmu, posljednji susret s njenim dječakom oteetim iz

naručja, kojeg više nikad nije vidjela čini se da je najviše uticalo na ove osnovce. Prenijela je poruku školarcima Ilidže, i oni su shvatili šta je zvjerski um učinio, da se ne zaboravi i ne ponovi. Semir Šaborić iz Pete osnovne škole nije krio emocije tokom posjete. „Nisam ovdje nikog izgubio ali osjećam takvu oštru bol, tugu i pitanje veliko iznad glave, zašto?“ rekao nam je Semir Šaborić. Amelina Čejvan iz Deste osnovne škole prvi put je u Potočarima. „Emocije su me savladale. Osjećam takvo treperenje, nelagodu i tugu. Kao da sam u nekom neprirodnom prostoru“, kazala nam je Amelina Čejvan. „Kada sam ušla ovdje imala sam osjećaj kao da je vrijeme stalo. Zaustavilo se. Iako ja nisam doživjela, osjećam bol. Muk. Tišina. Mi smo svi vesela djeca, volimo da se smijemo i družimo, ali na ovom mjestu svi šutimo i poglede obaramo. Svi znamo šta se ovdje dogodilo. Ovo mjesto čuva i pamti. Ovdje je naš narod, ovdje je naša Srebrenica i nikad ne zaboravite šta se ovdje dogodilo“, poručila je Hena Bilalović iz Osme osnovne škole „Amer Čenanović.“ Za ovaj projekat iz budžeta općine izdvojeno je 11.000KM. Općina Ilidža će u saradnji sa osnovnim školama i ubuduće nastaviti ovaj humani i edukativni projekat kojeg je u periodu od 2008. do 2013. godine posjetilo 5.000 osnovaca, koji su imali priliku posjetiti Potočare, vidjeti i čuti priče koji su preživjeli zločine planetarnih razmjera.



## Vijeće roditelja osnovnih škola Ilidže uručilo 70 paketa djeci Konjević polja

Koordinacija Vijeća roditelja osnovnih škola općine Ilidža uručili su 31. maja 70 paketa prehrambenih artikala i sredstava za higijenu djeci Konjević polja. Održan je i sastanak sa Vijećem roditelja Konjević polja i dogovorena buduća saradnja.



# Obilježene 22. godine od zločina nad ranjenicima kod Ljetne pozornice

Prije 22 godine, 14. maja desio se nezapamćen zločin, kada je agresor iz transportera UNPROFOR-a koji je u bolnicu Koševo prevezio pet ranjenika (Šefketa Đešević, Selmu i Jagodu Galešić, Anesa Bučana i Ismeta Osmanovića) preko dijela okupirane ilidžanske teritorije, izvukao teško ranjene Anesa Bučana, Ismeta Osmanovića i Jagodu Galešić i zvjerski ih ubio. Čuvajući sjećanje i njegujući historiju naše borbe protiv agresije na BiH i ove godine na tom mjestu delegacije Općine Ilidža, Jedinственe organizacije boraca "Unije veterana", rodbina i prijatelji položili su cvijeće na spomen obilježje kod Ljetne pozornice i odali počast svirepo ubijenim našim sugrađanima. Učenjem Fatihe i polaganjem cvijeća, svi zajedno okupljeni, iskazali su poštovanje prema našim herojima braniocima Ilidže. Zbog kiše nisu mogli doći brojni gosti i učenici ilidžanskih škola, za koje je trebao biti održan historijski sat. „Borci Armije BiH i narod Sokolović-Kolonije, Butmira i Hrasnice, bili su u vrijeme najtežeg ratnog krvavog perioda i znaju šta se ovdje dešavalo. Mi slabo naoružani, nedovoljno organizovani oduprijeli smo se mnogostruko jačem neprijetelju. Imali smo dojavu da spremaju napad i da su tu Arkanovci, Šešeljevci, Legija, mi smo se organizovali i krenuli u kontranapad. U borbama su naše snage imale početne uspjehe, ali padao je mrak, imali smo slabu uvezanost i izostala je dodatna vojna pomoć i municija i vratili smo se na početne položaje. Ovaj 14. maj će ostati vječno u mom sjećanju, jer sam i ja povezan u transporteru u UNPROFOR-a, teško ranjen, zamotan ništa nisam vidio samo čuo. Tada su četnici zaustavili vozilo, njih troje su oteli, a mene su bacili misleći da sam mrtav. Ali evo živ sam i svjedok sam ovih događaja, kazao nam je učesnik i preživjeli borac ovog događaja Šefket Đešević.

## Da se ne zaboravi i ne ponovi

Polaganjem cvijeća ispred spomen-ploče na Srednjoj tehničkoj školi, grafičkih tehnologija, dizajna i multimedije, 12. maja 2014. godine, obilježen je Dan logoraša općine Ilidža pod nazivom „Da se ne zaboravi i ne ponovi“. Cvijeće su položili delegacije Saveza logoraša Bosne i Hercegovine i Kantona Sarajevo, te udruženja logoraša općina Ilidža, Ilijaš, Novi Grad, Stari Grad i Hadžići. Mnogobrojnim prisutnim obratili su se predsjednik Udruženja logoraša Općine Ilidža Enes Dželimović, predsjedavajuća Općinskog vijeća Ilidža Smiljana Viteškić, potpredsjednik Saveza logoraša Kantona Sarajevo Almin Đelimović i predsjednik Saveza logoraša Bosne i Hercegovine Jasmin Mešković. Mešković je poručio predstavnicima vlasti da je potrebna veća moralna i materijalna potpora ovoj kategoriji društva koja još uvijek nema svoj zakonski okvir, kojim bi riješila svoja statusna prava. Predsjednik Udruženja logoraša općine Ilidža Enes Dželimović istakao je da je na području općine tokom agresije na Bosnu i Hercegovinu bilo osam logora u kojima su nevini ljudi zvjerski mučeni i ubijani, a počinioci ovih zlodjela još nisu otkriveni i procesuirani.



Jedan od preživjelih koji je prošao pakao ilidžanskih logora je i Fadil Ramusović. Prisjećajući se tih teških trenutaka kazao je: „U četničkom logoru na Ilidži bio sam zatočen 40 dana bez hrane, pića, uz svakodnevno zlostavljanje kako fizičko tako i psihičko. Tuširali su nas vrelom pa onda hladnom vodom, nakon čega sam razmijenjen. Bili su to moji najduži i najteži dani u životu. Mi smo jedina kategorija koja nema zakon kojim bi regulisali svoja prava“. Prigodan program izveli su učenici ilidžanske Prve osnovne škole.

## Obilježen Dan Zlatnih ljiljana i Zlatne policijske značke

Članovi Udruženja „Zlatni ljiljan i Zlatna policijska značka“ Ilidža, 7. maja 2014. godine tradicionalnim druženjem, obilježili su svoj dan i Dan pobjede nad fašizmom. Dobitnici najvećih ratnih priznanja obišli su mezarja i proučili Fatihu šehidima u Butmiru, Kovačima Hrasnica i položili cvijeće ispred centralnog spomen obilježja kod zgrade Općine Ilidža i ispred obilježja u Butmiru i Hrasnici. U parku u Hrasnici položeno je cvijeće na mezare šehida i Zlatnih ljiljana Emira Bogunića Čarlija i Ejuba Sarajkića Eke. Članovi udruženja su prisustvovali svečanoj akademiji u Općini Novi Grad koja je organizovana za sve učesnike Kantonalnog druženja.



## Dani Prve samostalne brigade Stup

U prisustvu saboraca, članova porodica šehida i poginulih boraca, predstavnika boračkih udruženja, Općine Ilidža i stanovnika Otesa, 19. maja 2014. godine ispred mjesne zajednice Otes održana je centralna manifestacija obilježavanja 22. godišnjice formiranja Prve samostalne brigade Stup. Delegacije su učenjem Fatihe i polaganjem cvijeća na spomen obilježje ispred mjesne zajednice odale počast poginulim braniteljima ovih prostora. Održan je i historijski sat na kojem su o značaju ove brigade i odbrani ovih prostora govorili ratni komandanti jedinica. Prigodan program izveli su učenici Prve osnovne škole. Cvijeće je položeno i na centralno spomen obilježje ispred zgrade Općine Ilidža.

U okviru manifestacije Dani prve samostalne brigade obilježen je i Dan mjesne zajednice Otes, te održani memorijalni turnir u stonom tenisu Hakija Kulovac, šahovski memorijalni turnir Oteškog bataljona i turnir u malom nogometu posvećen Emiru Teroviću Cicku, maloljetnom zlatnom ljljanu. Organizator ove manifestacije je Udruženje Prva samostalna brigada Stup uz pomoć Općine Ilidža, mjesnih zajednica Otes, Stup, Stupsko brdo, Udruženja Step junior, Stonotenisnog kluba Ilidža, NK Stup i KSOR Partizan.



## Obilježena godišnjica bitke za Stojčevac

U organizaciji JOB „Unija veterana“ Ilidža i Općine Ilidža u prisustvu boraca, članova porodica šehida i poginulih boraca, predstavnika Općine, učenika i brojnih građana, 15. maja 2014. godine, obilježen je Memorijalno-historijski susret „Dani bitaka za Stojčevac“. Na spomen-obilježju Stojčevac, poginulim borcima Harisu Opankoviću, Nedžadzu Granulu-Gigiju kao i svim drugim borcima odata je počast i dužno poštovanje, gdje je proučena Fatiha i gdje su predstavnici Općine Ilidža i Unije veterana Ilidže položili cvijeće. Cvijeće je položeno i na centralnom spomen-obilježju u Hrasnici. Prije 20 godina, tog 15. maja 1992. godine nakon povlačenja snaga UN-a, agresor je krenuo u osvajanje Stojčevca strateški najvažnijeg mjesta za odbranu Ilidže, Sarajeva, a i Bosne i Hercegovine. U tome su ih, nakon teških i krvavih borbi, spriječili borci 104. motorizovane brigade Armije RBiH i sačuvali ovaj strateški značajan prostor. Od tog dana svakodnevno su se vodile žestoke borbe sa agresorom za očuvanje ovih teritorija, pa je ovaj datum simbol svih tih bitaka, dan sjećanja na sve šehide i poginule borce koji su dali svoje živote za slobodu i odbranu ove teritorije i cijele Bosne i Hercegovine. Ovaj značajan datum je ujedno i Dan mjesne zajednice Hrasnica II, koji je tradicionalno obilježen nizom kulturno-sportskih manifestacija. Tim povodom održan je memorijalni turnir u malom nogometu „Haris i Gigi“ na kome su učestvovali učenici osnovnih škola iz Hrasnice, Sokolović- Kolonije i Butmira.



## Sjećanje na šehide i poginule borce

U organizaciji Udruženja Žene Kasindolske 92 i Općine Ilidža, 14. maja 2014. godine obilježen je Dan odbrane Ilidže, Dan stradanja građana Kasindolske ulice kao i Dan mjesne zajednice Stup II. Položeno je cvijeće na mjesto zarobljavanja stanovnika Kasindolske ulice i na centralno spomen obilježje na Stupu. Na taj način odata je počast šehidima i poginulim borcima koji su dali svoje živote za odbranu Ilidže i Bosne i Hercegovine. Nakon toga, u prisustvu rodbine, prijatelja, predstavnika boračkih udruženja i Općine u prostorijama mjesne zajednice Stup II održan je memorijalno-historijski susret na kome su se prisutni još jednom prisjetili hrabrosti i požrtvovanja branitelja ovih strateški važnih prostora, sa željom da trajno sačuvaju sjećanje na šehide i pale borce ovog područja.





# Obilježen Dan pobjede nad fašizmom



Drugi svjetski rat u Evropi, u kojem je živote izgubilo više od 50 miliona ljudi, završen je prije 59 godina. Na današnji dan, 9. maja se obilježava Dan pobjede nad fašizmom. Tim povodom zajednička delegacija Općine Ilidža i Udruženja antifašista i boraca narodnooslobodilačkog rata Ilidža, te delegacija SDP-a Ilidža i delegacija osnovnih škola Ilidže položili su cvijeće na spomen-kosturnicu u Velikom parku na Ilidži i odali počast svim poginulim u Drugom svjetskom ratu i proteklom odbrambeno-oslobodilačkom ratu u Bosni i Hercegovini. Svečanosti su pored članova UAB-NOR-a prisustvovali i predstavnici boračkih udruženja općine Ilidža, političkih partija, izviđača, učenika i brojni građani.

## Članice Udruženja „Zlatna ruka“ zasadile cvijeće ispred zgrade Općine Ilidža

Zelene površine ispred zgrade Općine Ilidža uljepšane su zasadima cvijeća koje su članice Udruženja „Zlatna ruka“ zasadile 12. maja 2014. godine. Kako kaže Predsjednica Udruženja „Zlatna ruka“ Zlatija Dizdarević, proljetne dane iskoristile su da zasade cvijeće i ispred svih spomen obilježja kako bi javni prostor učinile ljepšim i ugodnijim za sve stanovnike općine.



## Započelo licenciranje ovlaštenih procjenitelja

Obavještavanu se sve institucije i privredna društva na području općine Ilidža da je Federalno ministarstvo pravde započelo sa aktivnošću licenciranja ovlaštenih procjenitelja, kao i da su ovlaštene procjenitelji započeli sa radom. Ovlaštene procjenitelji obavljaju poslove procjenjivanja ekonomske vrijednosti pravnih osoba, imovine, obaveza i kapitala. Procjenjivanje ekonomske vrijednosti je ukupnost procjeniteljskog rada s ciljem utvrđivanja fer-vrijednosti pravnih osoba, imovine, obaveza i kapitala. To podrazumijeva djelatnost utvrđivanja knjigovodstvene, tržišne, zamjenske, likvidacione i poslovne vrijednosti pravnih osoba, imovine, obaveza i kapitala na osnovu vjerodostojne dokumentacije, fizičke sposobnosti predmeta procjene i budućih novčanih primitaka i izdataka. Osnovno načelo će biti da pravna osoba, imovina, obaveza ili kapital imaju ekonomsku vrijednost ukoliko stvaraju ekonomske učinke. Procjenjivanje će podrazumijevati i poslovne prezentacije rezultata procjene pred upravnim, sudskim, bankarskim i drugim tijelima prema njihovim zahtjevima.

# Obavještenje za korisnike javnih površina


Općinska komunalna i Općinska urbanističko građevinska inspekcija vršiti će nadzor nad korištenjem javnih površina na području općine Ilidža od 01.juna 2014. godine. Neophodno je u momentu kontrole posjedovati dokaz, odobrenje za korištenje javne površine ili dokaz o predatom zahtjevu za korištenje iste. Općinski inspektori će donositi rješenja za uklanjanje bespravno postavljenih sadržaja na javnoj površini i podnositi zahtjev za pokretanje prekršajnog postupka kod nadležnog suda.

Rješenje o uklanjanju sadržaja koja ne posjeduju odobrenje, dostavljaće se nadležnoj službi Općine, koja će utvrđivati naknadu za bespravno korištenje javne površine, u trostrukom iznosu od utvrđenog redovnog iznosa. Podjećamo, Općinsko vijeće Ilidža je 14.maja donijelo Odluku o privremenom korištenju javnih površina na području općine Ilidža. Ovom odlukom, visina i način plaćanja za privremeno korištenje javne površine utvrđen je i za objekte koji su u legalizaciji, dozidane, zimske bašte i objekte bez odobrenja za građenje.



## Završena izgradnja saobraćajnice u MZ Hrasnica I

U Mjesnoj zajednici Hrasnica I završeni su radovi na izgradnji saobraćajnice od ulice Begluk do ulice Lasičke megare. Investitor izgradnje je Općina Ilidža koja je za ovaj projekat izdvojila oko 20.000KM, dok je izvođač radova Mevludin Commerc d.o.o. Dužina saobraćajnice iznosi 135, a širina 4 metra.



## Započela rekonstrukcija ulice Plandište u MZ Vrelo Bosne

U ulici Plandište u MZ Vrelo Bosne započeli su radovi na rekonstrukciji. Ulica će biti dužine 355 i širine 5,5 metara. Investitor radova je Općina Ilidža, a izvođač radova je firma Sarajevo putevi d.d. Vrijednost radova iznosi 100.000 KM.

## U toku radovi na rekonstrukciji ulice Lopate

U MZ Butmir u toku je rekonstrukcija ulice Lopate koja će biti dužine 130 i širine 4 metara. Izvođač radova na saobraćajnici je Mevludin Commerc d.o.o., a investitor je Općina Ilidža koja je za izgradnju ove saobraćajnice izdvojila 15.000KM. Pored ovih projekata, vrše se i radovi na kpraži i sanaciji udarnih rupa na saobraćajnicama u svim mjesnim zajednicama u vrijednosti od 50.000 KM. Izvođač radova na ovom projektu je KJKP „Rad“ d.o.o. Sarajevo, a finansijer Općina Ilidža.

## Pušten u rad semafor na pješačkom prelazu Kasindolska - Rustempašina

Semafori na pješačkom prelazu Kasindolska – Rustempašina pušteni su u funkciju 27. maja 2014. godine. Do kraja sedmice očekuje se i otvaranje novoizgrađenog tramvajskog stajališta na ovom raskršću.

## Završena sanacija dijela Male aleje

Asfaltiranje dijela Male aleje završeno je 22. maja. Izvođač radova je bila firma KJKP „Rad“ d.o.o. Sarajevo, a investitor je Općina Ilidža koja je izdvojila 5.000 KM.



## Općina Ilidža gradi osam novih igrališta

Ovogodišnjim budžetom Općina Ilidža će izdvojiti više od 100.000 KM za sanaciju, rekonstrukciju i izgradnju novih igrališta na području općine. Nova igrališta, njih ukupno osam, će se izgraditi u Hrasnici, Otesu, Stupskom Brdu, Ilidži Centar i na još nekoliko drugih lokacija. Sanacija i rekonstrukcija već postojećih igrališta koja su u znatno većoj mjeri oštećena će se izvršiti na tri lokacije, u Lužanima, Hrasnici I i Otesu. Iz Službe za razvoj, investicije i komunalne poslove Općine Ilidža ističu kako su ovo praktični i korisni projekti kojima se žele podstaći sportske aktivnosti mladih. Na tenderu koji je proveden odabrana je firma „Glovis“ iz Zenice koja će odmah nakon potpisivanja ugovora moći početi sa radovima. Općina Ilidža je u skladu sa svojim mogućnostima izašla u susret građanima općine Ilidža koji su kroz savjete mjesnih zajednica izrazili potrebu za obnovom i izgradnjom igrališta. Nastavak rada na projektima ovakvog tipa će se nastaviti i u budućnosti.

## Prva osnovna škola Ilidža proslavila 120. godišnjicu

Prva osnovna škola Ilidža proslavila je 30. maja 2014. godine u Kulturno sportskom i rekreacionom centru Ilidža, 120 godina postojanja. Pored svečanosti koja je upriličena i bogatog programa, predstavljen je i Godišnjak Prve osnovne škole za 2013/2014. godinu. U godišnjaku je prikazan historijat škole, osoblje, učenici svih razreda i uspjesi škole na takmičenjima. Prva osnovna škola je na svečanosti dodijelila i zahvalnicu načelniku Općine Ilidža prof. dr. Senaidu Memiću, za podršku, pomoć i izuzetno uspješnu saradnju koju godinama pruža ovoj obrazovnoj ustanovi.



## Upisano 587 prvačića

Na području općine Ilidža u aprilskom roku upisano je 587 prvačića. Od ukupnog broja upisanih mališana, 286 je djevojčica i 301 dječak. U ovom roku, najviše djece upisano je u „Petu osnovnu školu“ i to njih 69, a najmanje u O.Š „El-Manar“ i to 27 učenika. Osmu osnovnu školu „Amer Čenanović“ dobit će 45 prvačića. U „Prvoj osnovnoj školi“ upisalo se 65 đaka, „Druga osnovna škola“ primit će 61 učenika, „Treća osnovna škola“ 65, a „Četvrta osnovna škola“ 33 nova učenika. „Šesta osnovna škola“ će biti bogatija za 53 prvačića, „Sedma osnovna škola“ za 64, „Deveta osnovna škola“ za 44 i „Deseta osnovna škola“ za 61. Upis za školsku 2014/2015. godinu bit će nastavljen u drugom upisnom roku, u augustu.




## Proslavljen zajednički dan osnovnih škola

U Multimedijalnom centru Ilidža 30. maja 2014. godine proslavljen je „Dan osnovnih škola općine Ilidža“. Sa nastavnim osobljem učenici 11 osnovnih upriličili su prigodan program. Svojim nastupima, plesom, pjesmom, recitacijama su obogatili ovu priredbu i predstavili svoje škole na najbolji način. U programu proslave, koji je svečano

sjedinio pjesmu, ples, glumu i recitaciju, svoje su talente iskazali ilidžanski osnovci te dokazali da se zajednički trud, sloga i jedinstvo isplatilo. Među posjetiocima su bili direktori škola, nastavnici, roditelji učenika i predstavnici Općine Ilidža.

## Osnovci u posjeti Tunelu spasa

Fond memorijala Kantona Sarajevo u saradnji sa Općinom Ilidža je upriličio Dane otvorenih vrata Spomeničkog kompleksa Tunela D-B za učenike devetih razreda 11 osnovnih škola sa Ilidže. Obezbjedena je besplatna posjeta koja podrazumijeva stručno kustosiranje, gledanje dokumentarnog filma, razgledanje i upoznavanje stalne muzejske postavke, tematsku izložbu, prolazak kroz dio autentičnog tunela i historijski čas, s tim da je ove godine uvedeno i predavanje o opasnosti od mina i neeksploziviranih ubojitih sredstava (NUS) od strane uposlenika koji su za tu oblast educirani. Općina Ilidža je obezbijedila prevoz učenika, od škole do Tunela i nazad. Tunel spasa je jedinstven fenomen moderne historije čiji su značaj i efekti imali presudne posljedice za odbranu Sarajeva i BiH. Turistima koji danas posjećuju Muzej tunela spasa nezamislivo je da je nekoliko stotina hiljada ljudi zavisilo od malog uskog prolaza ispod Aerodroma. Sačuvani dio tunela, kao i eksponati u pratećem muzeju čuvaju uspomenu na hrabrost stanovnika Sarajeva i njihovu borbu za opstankom.



## Upriličen prijem za uspješne sportiste općine Ilidža

Načelnik Općine Ilidža prof. dr. Senaid Memić, upriličio je prijem 28. maja 2014. godine za sportiste ilidžanskih klubova koji su u proteklom periodu ostvarili zapažene rezultate. Načelnik Memić je sa sportistima razgovarao o stanju sporta, postignutim rezultatima i o daljoj podršci njihovom radu. Naglasio je važnost i vrijednost uspjeha mladih ljudi i istakao kako je svaka nagrada skromna za uspjeh koji su ostvarili. "Mi smo tim koji zajedno ide ka vrhu. Ponosan sam na vaše rezultate. Ova novčana sredstva koja su vam uručena ne govore o vašim uspjesima i vrijednostima jer ste mnogo više zaslužili. Za ovo što ste predstavljali našu općinu i državu BiH niko vam ne može reći da bi napravio bolje od vas jer ste vi napravili najbolje", rekao je načelnik Memić. Denis Muhović, trener KK "CHAMPION" i selektor ženske seniorske reprezentacije BiH zahvalio je načelniku Memiću i Općini Ilidža u ime nagrađenih te istakao kako su sportisti najbolji ambasadori općine Ilidža i BiH. Općina Ilidža je izdvojila novčana sredstva u iznosu od 5.600 KM, a nagrađeni su Karate klub "Champion" i karate prvaci Ena Gljiva, Meris Muhović, Suad Tabaković, Zulfo Kukuljac, Haris Škrijelj, Haris Suljković i Anes Čongo. Novčanu nagradu je dobio i Bokserski klub "Ilidža", prvaci Adem Fetahović i Džemal Bošnjak, Karate klub "Ilidža" i njihov uspješni predstavnik Nermin Potur, Kick boxing akademija "Ilidža" sa sportistima Edinom Sinanovićem i Asmirom Tahirovićem i Kik boxing klub "Zlatni borci" sa nagrađenom prvakinjom Adnom Stambolić i prvakom Amirom Avdićem.



## Književno veče i besplatne projekcije JUKSR „Hrasnica“



Povodom 23. aprila, Svjetskog dana knjige i autorskih prava, JUKSR Hrasnica – Ilidža je organizovala i u multifunkcionalnoj sali Doma kulture Hrasnica realizovala Književno veče za učenike Druge, Četvrte

i Pete osnovne škole. Oko 80 posjetilaca, učenika sa svojim predavačima, uživalo je u ugodnom druženju sa istaknutim bosanskohercegovačkim piscem Mirsadom Bećirbašićem i sarajevskim kantautorom Senadom Bostandžićem. Tom prilikom Mirsad Bećirbašić je prezentovao i svoju novu knjigu „Slova od snova“. I ovog puta, vrijedni članovi Sekcije biblioteke Doma kulture Hrasnica „Mali bibliotekari“ i učenici-članovi školskih sekcija, uzeli su učešće u programu te predstavili svoje literarne radove. U saradnji sa Drugom i Četvrtom osnovnom školom, JUKSR Hrasnica – Ilidža je u multifunkcionalnoj sali Doma kulture Hrasnica nastavila sa realizovanjem besplatnih projekcija edukativno-zabavnog karaktera. Tokom aprila održano je sedam različitih projekcija (po izboru predavača) za 262 učenika različitog uzrasta, odnosno, za 13 odjeljenja iz Druge i Četvrte osnovne škole.

## Promoviran film „Imami šehidi“



U sali Općine Ilidža 6. maja 2014. godine održana je promocija dokumentarnog filma „Imami šehidi“. Zbog historijske istine i potrebe da se generacijama koje dolaze ostavi dokumentarni materijal

koji će svjedočiti da su imami dijelili sudbinu napaćenog naroda BiH, postojala je potreba za ovim dokumentarnim filmom, istaknuto je na promociji. Imami su svojom borbom dokazali da žele jedinstvenu državu svih naroda i građana s punom slobodom svakoga čovjeka. Najveći broj njih život je izgubio u okupiranim dijelovima BiH. Organizator prikazivanja filma je Organizacioni odbor za kolektivnu dženazu civilnim žrtvama u Bratuncu i Udruženje „Žene Podrinja“.

## Manifestacije sa raznovrsnim programom

Hera Big Domu kulture Hrasnica održana je manifestacija sa bogatim i raznovrsnim kulturno umjetničkim programom.. Pjesmom, igrom, koreografijama, skečevima, recitacijom i igrokazom mnogobrojnu publiku zabavili su učenici-članovi literarnih, dramskih, ritmičkih i folklornih sekcija Druge i Četvrte osnovne škole, članovi Sekcije biblioteke Doma kulture Hrasnica „Mali bibliotekari“, KUD „Hrasnica“, KUD „Ekrem Mujkić“ i KUD „Biseri Bjelašnice“, a najmlađi učesnici koji su svojim nastupom razveselili publiku bili su mališani iz Dječije igraone „Maraton“. U okviru programa organizovane su i izložba ručnih radova Udruženja žena „Zlatna ruka“ – Ilidža i izložba literarnih i likovnih radova na temu „Moje naselje“ učenika Druge i Četvrte osnovne škole, a realizovana je i projekcija video-foto albuma kojim su temom „Nekad i sad“ obuhvaćeni naselje Hrasnica, Dom kulture i Sportski centar, kao i kulturno-sportska dešavanja u istim. Istog dana, u Sportskom centru Hrasnica, a u saradnji sa ŠF „Fair play“, održan je Malonogometni turnir „Za malu raju“.




### Općina Ilidža donirala šest kontejnera Općini Zenica

Načelnik Općine Ilidža prof. dr. Senaid Memić je 31. maja 2014. godine uručio načelniku Općine Zenica Husejinu

Smajloviću ključeve šest kontejnera, namijenjenih za privremeni smještaj žrtvama poplava i klizišta, onima koji su ostali bez svojih domova. Donirani kontejneri su novi, opremljeni su potrebnim sanitarijama. Primopredaja je obavljena u krugu zeničkog Vatrogasnog doma. Nakon predaje kontejneri će biti otpremljeni tamo gdje su najpotrebniji. „Općina Ilidža je ovih šest kontejnera donirala Zenici da smjesti ljude koji nisu spremni da idu u stanove. Želimo da im u ovim trenutcima bar donekle

olakšamo uslove života. Donacija je vrijedna 50.000 KM. Kontejneri su prazni, ali su uslovni za život jer imaju instalacije i mokre čvorove. Nadamo se da smo bar nekome pomogli“, izjavio je načelnik Općine Ilidža prof. dr. Senaid Memić.

„Ovo je najveća pomoć koju je Općina Zenica dobila. Ovo nam omogućava predah i pomaže u organizaciji pomoći. Zahvalni smo Općini Ilidža“, rekao je Husejin Smajlović, načelnik Općine Zenica.



### Podsjetnik na minska polja općine Ilidža

Na području Ilidže minska polja se nalaze na mjesnim zajednicama Hrasnica 1, Rakovica, Blažuj i Vrelo Bosne. Površina je više od pet miliona kvadratnih metara i da bi se Ilidža u potpunosti očistila od mina i NUS-a, potrebna je investicija od oko 15 miliona KM.

Odkako je Civilna zaštita zadužena za čišćenje minskih polja urađeno je 194 projekata i deminirano je 4.635.708 metara kvadratnih. Na ovoj površini pronađena je 2.191 mina i 3.387 neeksplozivnih ubojitih sredstava. Raznim akcijama, dobrovoljnim predavanjima i otkupima, prikupljeno je još oko 4000 komada NUS-a. Vrijednost urađenih poslova deminiranja je više od 18 miliona KM. Služba civilne

zaštite Općine Ilidža po rezultatima rada je u prve tri općine u BiH. Iz ove Službe ističu kako je najveća nagrada u dosadašnjem radu što nisu imali tragičnih ishoda. Općina Ilidža još uvijek izdvaja sredstva za deminiranje, jer je sve manje donatorskih sredstava na ovu temu. Iz civilne zaštite napominju da zbog ogromne količine padavina postoji mogućnost svlačenja mina iz brdovitih terena na sigurne teritorije (livade, pašnjaci), terene koji nisu registrovani kao minska polja. U slučaju sumnjivih pojava, apeluju da se iste odmah prijave Civilnoj zaštiti Općine Ilidža na brojeve 033/636-069 ili na mobilni telefon 061/183-728, gdje će na lice mjesta izaći timovi za uklanjanje NUS-a.

### Sindikata Općine Ilidža podijelio 120 paketa stanovnicima poplavljenih područja

Predstavnici sindikata Općine Ilidža proteklih dana posjetili su poplavljenim područjima općine Ilidža i razgovarali sa stanovništvom koje živi u naseljima koja su najviše pogođena poplavama. Sindikat je podijelio 40 paketa porodicama ugroženim od poplava sa područja općine Ilidža i 80 paketa je poslato u Maglaj. Paketi su sadržavali hranu i sredstva za higijenu. Članovi sindikata u nastavku akcije pružanja pomoći izdvojiti će po 1KM i uključiti će se u radne akcije čišćenja koje će biti organizovane na prostoru najugroženijih područja.



## MIRA BORAS, pomoćnica načelnika za poslove civilne zaštite

*Na čelu što bi rekao naš narod muške službe, Službe civilne zaštite Općine Ilidža nalazi se Mira Boras. Ovu funkciju obnaša osam godina, i u tom periodu je obavljala veoma zahtjevne i važne poslove. U periodu poplava koje su zadesile općinu Ilidža radila je na koordinaciji poslova koji su bili od velike važnosti za stanovnike poplavljenih područja, ali i za rad Općine Ilidža.*

### Šta podrazumijeva posao pomoćnika načelnika civilne zaštite i kako je biti žena u tom poslu?

U skladu sa Zakonom o zaštiti i spašavanju od prirodnih i drugih nesreća definisane su obaveze rada Službe u smislu koordinacije nadležnih Službi za sprovođenje preventivnih mjera u okviru svojoj redovnih djelatnosti. Situacije kao što su poplave, koje su u vrlo kratkom periodu napravile kaos nisu nimalo lak posao, ali mislim da smo se kao služba dobro snašli.

### Šta je civilna zaštita radila za vrijeme poplava na ilidži?

Od nastanka poplava, pripadnici civilne zaštite konstantno su bili na terenu u smislu praćenja i organizovanja tijela za zaštitu i spašavanje. Angažovani povjerenici CZ mjesnih zajednica, Službe zaštite i spašavanja sa mehanizacijom su radili na čišćenju propusta ispod mostova i izradi nasipa, dovozu

nasipnog materijala za punjenje vreća kao i evakuaciji stanovništva. Pomogli su Općina Ilidža, Crveni križ Ilidža, Kantonalna i Federalna uprava civilne zaštite kao i susjedne općine, razne privatne firme, jedni su donirali prehrambene pakete, drugi mehanizaciju i nasipne materijale.

### Sa kakvim ste se problemima susretali?

Najveći problemi su nas zadesili na Stupu, nasip od strane Autocesta koji je napravio vještačku branu, a probleme prouzrokovane ovom branom osim Stupa smo imali i u Osjeku. Zadesila nas je vremenska nepogoda, ali u svemu ima i ljudskog faktora - prave se vještačke deponije, kuće se grade u plavnim područjima...

### Kakve su posljedice poplava na Općini Ilidža?

Mnogi objekti su poplavljeni, ulaskom vode u kuće nastaju ogromne štete, propadaju usjevi, firme koje su bile na lokalitetu poplava pretrpjele su velika oštećenja kao i zastoj procesa proizvodnje. Poslije kiša pojavilo se devet novih klizišta na području Blažuja, Osjeka i Rakovice na kojima ima stambenih jedinica i može doći do oštećenja istih.

Također, izdali smo upozorenje za minska polja. Podsjećam, usljed velike količine padavina, postoji mogućnost „svlačenja“ mina van obilježanih teritorija.

### Koje su aktivnosti provedene nakon povlačenja vode?

Poslije povlačenja urađeno je iscrpavanje vode iz podrumskih prostorija naseljenih objekata, dezinfekcija od strane Javnog zdravstva u svim poplavljenim prostorijama, ukupno njih 187 i tri ambulante. Obavljena je i deratizacija, a to su uradili Zavod za Javno zdravstvo, Deratizer „Kristal“ i „Sanitacija“.

### Šta su Vaše preporuke za naredni period?

Moje preporuke su da se vodi računa o odlaganju smeća, čišćenju propusnih kanala, da stanovnici uvijek budu spremni na ovakve situacije, s obzirom da se njihovi objekti nalaze u plavnom području. Bitno je da imaju određenu količinu hrane i vode, higijenskih potrepština i sredstava za ličnu zaštitu, čizme, lopate, krampe, prvu pomoć. Ukoliko dođe do povećanja vodostaja, stvari podizati na višojim mjestima i da stanovnici sami na vrijeme da počnu puniti vreće i podizati nasipe.

## Stanovnici Ilidže prikupili pomoć za poplavljena područja u BiH

Stanovnici Ilidže su prikupili pomoć za najugroženije porodice poplavljenih područja u BiH. Prikupljeno je oko 30 tona osnovnih životnih namirnica, higijenskih potrepština, gumenih čizama i lopata. Iz Velike aleje, 19. maja, krenula su tri kamiona pomoći za Janju, Maglaj i Zavidoviće, a za 20. maj bio je najavljen polazak volontera koji će pružiti svoju pomoć u čišćenju poplavljenih područja u Maglaju. Odziv stanovnika općine Ilidža je bio iznad očekivanja. Vrlo brzo su se organizovali i u kratkom vremenskom periodu je sakupljena značajna količina paketa sa hranom i drugim potrepštinama. Načelnik Ilidže prof. dr. Senaid Memić je rekao kako je ponosan na svoje sugrađane koji su se u velikom broju odazvali ovoj akciji. Istakao je nadu da će Opština Ilidža i dalje u skladu sa finansijskim mogućnostima pomagati svima kojima je pomoć potrebna. Nastavak akcije prikupljanja na prostoru općine Ilidža će biti organizovan u mjesnim zajednicama Butmir, Blažuj i Rakovica.





## Akcija čišćenja Olova i Maglaja

Na vanrednoj sjednici Kolegija Općinskog Vijeća Ilidža održanoj 21. maja, načelnik i predsjedavajuća Općinskog vijeća donijeli su Odluku o obrazovanju koordinacionog tijela Općine Ilidža za organizovanje i pružanje pomoći stanovništvu koje je pogođeno elementarnim nepogodama. Općina Ilidža je organizovala akciju čišćenja u kojoj je učestvovalo 45 ljudi među kojima su i članovi Ekološkog udruženja „Aleja“ koji su u subotu 24. maja 2014. godine, u ranim jutarnjim satima krenuli u Olovo. U njihovoj pratnji krenulo je jedno vatrogasno vozilo za pranje ulica i konvoj pomoći koji se sastojao od jedne tone nafte i higijenskih potrepština u vrijednosti od 2.000KM. Po dolasku u Olovo pomoć je predata i ljudstvo je raspoređeno u tri ekipe. Jedna od njih su bili vatrogasci koji su odmah krenuli sa pranjem ulica, a druge dvije ekipe su čistile podrumne zgrade i jedne apoteke.

„Pošto smo došli iz općine koja se susretala sa poplavama i problemima koje one nose bili smo opremljeni sa svim potrebnim alatom kao što su lopate, čizme i kolica. Domaćinu, načelniku Općine Olovo, smo se stavili na raspolaganje i zadovoljstvo nam je što smo učinili jedan takav posao, što smo pomogli ljudima. Ovo je četvrta po redu akcija Općine Ilidža. Ekipe su već bile u pomoći Janji, Maglaju i Vogošći i na sva ta mjesta su poslali humanitarni paketi i pomoć u ljudstvu. Naša općina u saradnji sa privrednicima pokazala se kao dobar primjer povezivanja i zajedničkog djelovanja koje je razultiralo akcijama pomoći gdje god je to potrebno. Općina Ilidža ima potencijala, a to su dobri ljudi“, rekao nam je Muhamed Omerović, dopredsjedavajući Općinskog vijeća Općine Ilidža. Predstavnici Fondacije „Dobro srce“, „Zlatna ruka“, KUD „Ilidža“ i uposlenici Općine Ilidža 30. maja uključili su se u pomoć čišćenja Maglaja. Tom prilikom očišćeno je dvorište Osnovne muzičke škole. Općina Ilidža je donirala i tonu nafte.

## Obilazak poplavljenih područja

Načelnik Općine Ilidža prof. dr. Senaid Memić, predsjedavajuća Općinskog vijeća dr. Smiljana Viteškić i pomoćnica načelnika za poslove civilne zaštite Mira Boras, obišli su i 22. maja stanovnike Gladnog polja i Osjeka, čije su kuće poplavile. U razgovoru sa građanima čelni ljudi izrazili su suosjećajnost s teškoćama u kojima su se stanovnici našli i obećali pomoć u skladu sa finansijskim mogućnostima pomoć. „Ove poplave su nas ujedinile. Materijalne štete koje ste pretrpjeli su velike, ali veliko je i uključivanje, solidarnost i humanost svih građana Ilidže. Moja vrata su vam uvijek otvorena za razgovor i pomoć, koliko mi budžet dozvoljava“, rekao je načelnik Memić u razgovoru sa građanima. Na području općine Ilidža u toku je deratizacija svih područja koja su bile zahvaćena poplavama. Deratizaciju izvode Zavod za javno zdravstvo, te firme Kristal i Sanitacija i deratizer. U poplavljenim područjima voda iz gradskog vodovoda je ispravna za piće, dok se iz bunara i iz lokalnih izvora ne preporučuje za korištenje. Apelira se na građane da koriste sigurne namirnice kao što su konzerve i namirnice koje nisu bile u kontaktu sa plavnom vodom.



## Plan izlaganja izvoda privremenog biračkog spiska na području općine ilidža za opće izbore 2014.godine

Općinska izborna komisija Ilidža obavještava građane da će moći izvršiti uvid u Izvod privremenog biračkog spiska za birače koji glasaju na redovnim biračkim mjestima. Građani će moći izvršiti uvid u periodu od 14. juna do 14. jula 2014. godine, od 8,00 do 16,00 sati u prostorijama svih 16 mjesnih zajednica. Također, uvid u će se moći izvršiti i u Centru za birački spisak u zgradi Općine Ilidža, soba br.15 od 8,00 do 18,00 sati. Raseljena lica sa područja Općine će samo u Centru za birački spisak moći izvršiti provjeru svojih podataka kao i opredjeliti se za biračku opciju podnošenjem zahtjeva (obrazac PBO-1) do 29.07.2014.godine. Birači koji uoče nepravilnosti i pogrešne podatke imaju pravo zahtijevati ispravku ličnih podataka. Zahtjev se podnosi organu nadležnom za vođenje podataka čija se ispravka zahtijeva. Za sve dodatne informacije građani se mogu obratiti Centru za birački spisak na brojeve 033/775-617, 033/763-465 ili na e-mail birački@opcinailidza.ba.

# JAVNI POZIV ZA IZBOR NAJLJEPŠEG DVORIŠTA I BALKONA SA CVIJETNIM ARANŽMANOM NA PODRUČJU OPĆINE ILIDŽA

I

Pozivamo sve zainteresovane građane da prijave svoja dvorišta i balkone na takmičenje za izbor najljepšeg dvorišta i balkona sa cvijetnim aranžmanom na općini Ilidža.

Prijaviti se mogu svi zainteresovani građani koji imaju prebivalište na području općine Ilidža.

II

Odluku o izboru najljepšeg dvorišta i balkona donosi Općinski načelnik na prijedlog Komisije koju će imenovati u tu svrhu, a koja će običi prijavljena dvorišta i balkone, sačiniti foto-dokumentaciju i ocjeniti ih prema sljedećim kriterijima:

- Održavanje i urednost dvorišta – balkona;
- Prostorni odnosi sadržaja u dvorištu – na balkonu;
- Uloženi trud, izbor i njegovanje biljaka, poštivanje tradicije i elemenata našeg podneblja;
- Ukupni estetski dojam.

III

Za najljepše dvorište i balkon dodjelit će se po tri nagrade: prva, druga i treća u sljedećim iznosima:

za dvorište:	za balkon
I nagrada 500 KM	I nagrada 300 KM
II nagrada 400 KM	II nagrada 200 KM
III nagrada 300 KM	III nagrada 100 KM

IV

Svoje prijave možete poslati putem prijavnog obrasca kojeg možete preuzeti sa web stranice Općine: [www.opcinailidza.ba](http://www.opcinailidza.ba), u prostorijama MZ i info desku (šalter sala) Općine Ilidža.

Prijava treba da sadrži:

- 1.Ime i prezime;
- 2.Tačnu adresu, kontakt telefon ili e-mail adresu;
- 3.Za koju kategoriju natjecanja se prijavljuje (dvorište, balkon).

Zahtjevi se predaju putem pošte, na protokolu Općine Ilidža, ulica Butmirska cesta broj 12, sa naznakom za javni poziv za izbor najljepšeg dvorišta i balkona ili putem e-mail adrese [ilidzaturizam@gmail.com](mailto:ilidzaturizam@gmail.com)

**Javni poziv ostaje otvoren do 30.06.2014. godine.**

Sve dodatne informacije mogu se dobiti u Službi za privredu i turizam Općine Ilidža, soba 325, kontakt osoba Sitnić Indira, telefon 033 775 755.

Želja nam je da bar na trenutak istaknemo u prvi plan ljude koji su odlični primjeri kako neko ličnim angažovanjem može doprinijeti da se njihov najbliži, komšije i slučajni prolaznici osjećaju prijatnije, a samim tim budu i mnogo raspoloženiji te da podjele ljepotu sa drugima.

ZAHVALJUJEMO NA VAŠIM PRIJAVAMA I UČESTVOVANJU U OVOJ AKCIJI JER TIME DOPRINOSITE LJEPOTI I UGODNOJ ŽIVOTNOJ SREDINI, VJERUJUĆI DA ĆE UČESNICI SA OVOG TAKMIČENJA PORED NAGRADA PONIJETI I POZITIVNE EMOCIJE I ENERGIJU.